



MY GETUIENIS

'N GETUIENIS HOEKOM EK WERKLIK MET TULI'S BOER

deur Ben Raath

President van die Tuli Telersvereniging

As 'n bulkoper by jou op die plaas kom, is die eerste vraag wat hy altyd vra- hoekom boer jy met Tuli's en dan noem ons al hierdie wonderlike eienskappe van die ras- wat seker nie verkeerd is nie! As daar 'n Geestelike rede voor is, is ons mos te skaam om dit te noem, want netnou dink die persoon ek is skynheilig!

Eksel self het ook al 'n artikel in die Joernaal van 2014 op bl. 56 geskryf, oor "hoekom ek met Tuli's boer" en ook al die wonderlike eienskappe van ons ras genoem, MAAR dit is nie die ware rede hoekom ek met Tuli's boer nie!

Die wonderlike van om boer te wees, is dat die liewe Vader ons nederig en op ons kniee hou en die afgelope knellende droogte bry ons maar op 'n manier. Ek glo baie van u kan daarvan getuig! Daarom voel ek die tyd is reg om nou die ware rede te gee.

In 2008 het ek Dorper ramme by Rikus en oom Ron van der Merwe (die voormalige West Front Tuli stoet) gaan koop en vir Rikus vertel dat ek 'n beesfaktor in my boerdery wil voeg, waarna hy my van sy Tuli beeste vertel en gaan wys het.

Nodeloos om te sê, die oomblik wat ek Tuli's gesien het, het hulle my hart gesteel. Dit was droog, die koeie was in goeie kondisie en elke koei het boonop 'n kalf te voet gehad. Die verskillende kleurskakerings van die trop koeie op ons Karooveld, was prentjie mooi.

Rikus het 'n paar Joernale vir my gegee en ek is daar weg. Ek is iemand wat my vrou (Sarina) by alles betrek en nie iets sonder haar goedkeuring sal aanpak nie. Nadat ek haar vertel het hoe mooi hierdie beeste is, het ons gaan le en kon ek nie slaap. Ek het tot laat die aand gele en fotos kyk en ook al die "goeie eienskappe" in artikels gelees.

Rikus het 'n Produksie veiling oor 3 maande en ek moet 'n besluit neem. Eerstens moes ek besluit, gaan ek my paar Nguni koeie verkoop en oorskakel na Tuli's en die tweede vraag, gaan ek 'n stoet registreer- dan praat jy van 'n groot kapitale uitleg! Ek sal dit op skuld moet doen.

Ons het daarvoor gebid en gebid, maar kry nie duidelikheid. Kort daarna was ons by Nampo en het

heel eerste die Tuli stalletjie besoek en met Russell Clark en Alwyn Marx gesels- hulle was baie behulpsaam (hul sal seker nie onthou). Ek het alle beskikbare inligting by hulle gekry en is daar weg, maar gereeld teruggegaan om na die diere te kyk! Ek het ook my naam en besonderhede in die besoekersboek geskryf, sodat die sekretaresse nog meer inligting kan aanstuur. Min het ek geweet dat ek 'n paar jaar later, self daar gaan werk!

Sarina het in 2005 'n kursus in kuns in De Aar gevolg en deel van hul opdragte was, om 'n foto collage van jou lewensverhaal te maak (foto aangeheg). Heel bo is ons 3 kinders Janke, Bennie en Cara, reg onder is rante in die veld (Spitskop), dan is daar ons plaashuis en skuur, ons het ook vir 'n paar jaar in die dorp in

Raath st I gebly, die eende- dam voor plaashuis, Bennie se perd, my ou plaasbakkie, skaaphond, my 1946 Jeep CJ2A, dorper skape, my Jeep se registrasie nommer ens. Ons hele lewe in een skildery vasgevang.

'n Week voor Rikus se veiling het ons nog nie duidelikheid en die senuwees knaag en die tyd raak min. In my hart wil ek net Tuli's koop, maar is dit die regte ding??! Net na middagete (ek was alleen by die huis) het ek na ete in die Tv kamer, (waar ek elke aand sit en waar die collage al vir 3 jaar hang), op my stoel gaan sit en ek begin bid.

Ek praat reguit met die Here en sê vir Hom oor 'n week is die veiling, ek wil asb duidelikheid hê, anders gaan ek dit nie doen nie- ek kan nie bekostig om 'n fout te maak nie. Ek het lank met

die Here gepraat en toe ek Amen se en my oepmaak, kyk ek reguit op na die colallage (toevallig?!- ek twyfel!). Meteens voel dit asof daar skille van my oepmaak en vir die eerste keer na 3 jaar let ek op na die beeste! Ek het hoendervleis gekry en kon die teenwoordigheid van die Heilige Gees duidelik in die vertrek aanvoel! Dit lyk dan soos Tuli koeie!

Sarina was by die werk, ek het haar dadelik gebel en alles verduidelik en gevra waar kom sy aan die foto van die beeste. 'n Collage word van foto's gemaak, wat jy uitknip, plak en dan verf. Sy het my vertel dat sy dit in 'n

Landbouweekblad gekry het. Onthou op daardie stadium het ek met Nguni's geboer, hoekom het sy dan nie Nguni's gebruik nie? Nguni's sou self mooi gelyk het.

My hart het begin klop en dadelik die Landbouweekblad gesoek- ons mense wil mos altyd meer bewyse he!! Ek het hom gekry en dit was 'n artikel wat wyle oom Stefan Welz oor Tuli's opgestel het!

Hoe wil 'n mens 'n duideliker antwoord he as dit en die beste van alles is, is dat die Tuli's amper in die middel van alles staan.

Hierdeur wil ek net se, dat die Here nooit te laat is nie en wanneer jy Sy naam waarlik aanroep, Hy altyd sal antwoord. Partykeer is dit nie altyd wat ons wil hoor nie, maar Hy weet die beste.

In my geval kyk ek nie weer terug nie en kan ek werklik die hand van die Here oor my beesboerdery sien! My stoet gaan van krag tot krag. Kort daarna is ek tot die Tuli Raad verkies, daarna ondervoorsitter en vandag selfs die President.

In 'n opvolg kan ek dalk oor die jare daarna skryf. Dit laat my so aan die verhaal van Moses en die uittog uit Egipte dink- as die Here vir jou iets wys om te doen, beteken dit ook nie altyd net maanskyn en rose, maar die belangrikste, Hy sal jou ook daardeur help. ■



RAATHSTR.



N12 Britstown →
N10 De Aar
← N12 Strydenburg

BEN & SARINA
RAATH
Donkerhoek
DK
U VERNOOY IN WELVAART



BLW 321-NC